

四庫全書

史部

欽定四庫全書

史部

皇朝文獻通考卷五十四

內閣中書_臣寶汝翼覆勘

總校官中書_臣孫 澐

欽定四庫全書

皇朝文獻通考卷五十四

選舉考八

任子

臣等謹按虞書有云賞延于世而殷盤誥誠亦云
世選爾勞蓋因乃祖乃父之勤於王事而恩及其
子孫任子之制從來尚矣西漢門廕人才最盛如
蘇武之忠汲黯之直劉向馮野王之文學吏治皆

在于是則任子中亦大有人在也第以恩澤得官
其類不一有賜任者有奏任者有恩任者如南郊
聖節致仕遺表秩滿兩任皆得廕及子弟所謂尚
嬉竹馬已獲荷囊未應娶婦已得任子時已覺其
太濫至如東漢延熹中宦官任子布滿州縣故明
王振廕及貂璫拖朱曳紫比比皆是又其甚焉者
矣我

國家慎重名器不以爵賞濫施凡勲閥故家子孫或

襲世爵或襲世官皆得以才地與選宿衛日侍

殿廷

教訓而成立之以備

國家楨幹之選其因

恩詔賜蔭者例應視祖父品級入監肄業考試授官又
慮其稚齒顛蒙恃前人之資蔭面墻不學蒞事為
慙是以今在部學習行走分別優劣以辨去留其
長于騎射願改武途者聽之既以昭

朝廷世及之恩亦以安臣子承家之分所謂仁之至義之盡也至人臣臨危盡節致命遂志不復慮及後昆而

卹典施於身後裔嗣以難廕受官是又我

國朝所以勸忠旣往垂訓方來不嫌于優渥者也因述選舉備著於左方

順治十一年國子監奏覺羅廕生一例送監讀書俟月分滿日亦與官員廕生一例照等銓授從之

十三年定滿洲蒙古恩廕例一品二品官廕生俱以六品博士用三品官廕生以七品筆帖式用

十八年奉

恩詔滿漢官員文職在京四品以上在外三品以上武職京外二品以上送一子入監讀書三年期滿候銓凡官員非現任者及未承廕之先曾經緣事治罪者俱不准廕至康熙三年題准各官廕監生其父緣事革職其廕子未仕者革廕已仕者免止於降

調者仍留蔭康熙六年定各官不論品級暨宮保等銜均照實俸蔭子其遇

詔各官蔭子均查明准蔭以後稱遺忘補請者不准康熙十年議准文職雖草尚存武職者仍留蔭康熙十二年定原品解任食俸者准蔭武職恭遇

恩詔鑾儀衛鑾儀使提督總兵及帶一品銜管副將事等官各准蔭一子入監讀書都督僉事管副將事及叅將管副將事者各送一子入監讀書其署副將

以下小銜副將不准廕監

康熙元年奉

諭旨原任大學士希福范文程寧完我額色黑皆自

太宗文皇帝歷任內院贊理機務効力最久勤勞素著其
子宜加擢用以示鼓勵范文程子范承謨額色黑子塞
色黑已補內院學士希福寧完我各一子亦著以學士
用

吏部題請補用恩廕生秦保等十四人得

首長春宮讀書大臣之子均蒙

世祖章皇帝選入今當補用在內俱著授以二等待衛在
部院俱著授以郎中

三年定承補恩蔭例凡承蔭先以嫡長子孫如嫡
長子孫出仕或有故方蔭適次子孫無適次子孫
方蔭庶長子孫庶長皆無方蔭弟暨兄弟之子應
合承繼者其子孫在

詔後生者不准蔭其蔭生未仕而故准補一人患病殘廢

者驗明退廕別補已補而又故者不准再補又定
各官廕監生已得官職暨科目中式者不准補廕
定漢軍難廕生均以州縣選用凡漢軍難廕生例
俱以知縣知州隨到隨補漢人難廕生例俱以小
京官用據廕生袁象乾等呈稱缺少人多永無補
用之期得

旨漢軍漢人陞轉既已一體以後漢人難廕生俱著照漢
軍之例行旋議改漢軍廕監生亦照舉人例以知縣用

又定漢軍漢人殉難廕生三品以上者以知州用
四品以下者以知縣用布按都三司首領及州縣
佐貳六品七品官之子以縣丞用八品九品官之
子以縣主簿用未入流之子以州吏目用

六年准旗人廕監生分別學習定例滿洲蒙古漢
軍廕生監生武官之子以部院衙門用文官之子
照品級隨旗上朝至是吏部奏准嗣後不論文武
年二十以上者照分部進士之例分派各部院衙

門學習二年期滿果行走勤慎熟悉部務該堂官
奏准移咨吏部照例銓補其有才識出衆之員許
堂官指名具題即行補用其不能學習情願隨旗
上朝者各照品級准其隨旗上朝或已經學習而
行走平常不能辦理部務者咨回該旗行走
定廕生授官例公侯伯一品官廕生以部院衙門
五品缺用二品官廕生以六品缺用三品官廕生
以七品缺用四品官廕生以八品缺用尋定

恩詔廕生漢正一品官以員外郎治中用從一品官以主
事用正二品官以主事都察院經歷京府通判用
從二品官以光祿寺署正大理寺寺副用正三品
官廕生以中行評博通政司經歷太常寺典簿用
從三品官廕監生以光祿寺典簿鑾儀衛經歷詹
事府主簿京府經歷用四品官廕監生與捐貢監
考職人員一體考定職銜入於應選分內分缺輪
班選授漢軍正一品從一品官以員外郎用正二

品從二品官以主事大理寺寺正用正三品從三
品官以七品筆帖式用四品官以八品筆帖式用
八年吏部奏定八旗滿洲漢軍文武官員廕生監
生內有不能兼習滿漢字者有蒙古廕生監生內
不識滿字亦有全不識字者不便以部院衙門用
應報明吏部或願學習或願子弟頂補或願隨旗
上朝分別辦理

又加

恩舊臣之子廕戶部尚書蘇納海子瓦爾達兵部尚書朱
昌祚子朱紱工部尚書王登聯子王盛唐入監讀
書以通政使左右通政大理寺少卿督捕左右理
事官等缺用

九年准包衣下官員子弟一體承廕凡包衣佐領
下官員子弟向不准為廕生監生至是吏兵二部
奉

諭旨內外官員効力相同加恩豈宜有別嗣後包衣佐領

下官員子弟准為廕監爾部定議具奏尋議包衣下一品官子弟許其承廕二品至四品各廕一子入監讀書從之

又禮部奏據國子監呈稱順治初年八旗官學生不論文武官員子弟每佐領下選擇二名移送國子監教習順治十八年停止今奉

諭旨文武廕生仍以部院衙門錄用以後應仍遵往例送監學習應如所請從之

十三年兵部奏舊例武職官陣亡皆照依職任閒散之官未經議及至是奏准將有部劄効用閒散各官陣亡者不論銜級大小皆廕子弟一人以衛千總用

十四年

賜殉難副將遊擊各廕子弟一人以守備用外委官俱廕子弟一人以千總用福建江西陣亡殉難官皆倣此例

又吏部奏靖逆將軍甘肅提督侯張勇出首逆賊
吳三桂偽劄今又恢復河州洮州為國効力克盡
忠誠應將伊子一品官廕生張雲翼從優以大四
品京堂用從之

五十二年宗人府以宗室內素無廕子入監讀書
之例奉

萬壽恩詔授宗室之子為廕生其應將何等宗室給與廕
生及廕生入監讀書期滿作何行走之處具奏奉

旨未入八分公以下鎮國將軍輔國將軍及宗室內為一二品大臣者俱准給廕生其廕生入監讀書之後即令隨旗行走

雍正元年定考試廕生例先是文武廕生監生由國子監肄業期滿咨送吏部係武職廕生咨查兵部品級題廕年月有無事故文職廕生吏部查照品級題廕年月俱俟國子監咨送到日吏部將年二十以上者查明有二三人到部即考試履歷進

呈帶領引

見歸于月分先後揆選其同日題廕者照題疏先後錄用
未經考試者不准銓選至是奉

諭旨內外廕生監生等到部考試繙譯書法再分派各部
行走令伊等咸得勉力學習至世襲官員所得三品廕
生內若考試有列優等者仍著奏聞賜以所應得原品
如此則伊等必痛自砥礪以求上進不但國家得有用
人才足供任使即各部院衙門亦不至令無知子弟羣

廁其間率意肆行為衆人所譏議矣

三年考試八旗滿洲漢軍廕生頭等遇缺即用二等照本班挨次補用三等隨旗上朝

吏部議覆詹事錢以塏條奏嗣後提鎮諸臣所得廕生除通習文理者照例考試以文職補授外其有幼習武藝人材壯健願改武職者令其呈明吏部移咨兵部考試簡用凡廕生改用武職者京官一品尚書等官及外任總督將軍廕生俱以都司

僉書銜管都司僉書用二品侍郎等官及巡撫提
督廕生俱以署都司僉書銜管都司僉書用三品
副都御史通政使等官廕生總兵官布政使廕生
俱以守備銜管守備用按察使廕生加一品大銜
副將廕生俱以署守備銜管守備用二品銜副將
之廕生以守禦所千總用小銜副將之廕生以衛
千總用又定廕生願改武職者呈部咨送考驗弓
馬技藝將年力精壯者帶領引

見恭候

欽點侍衛外其餘或交巡捕營行走學習或交外省督撫
提鎮隨營試用俟弓馬熟嫻營務通曉在巡捕營
者該統領帶領引

見交兵部按品補用都司以人文到部先後補用守備衛
千總於各班之末輪補一人守禦所千總歸入劄
班內補用在外省試用者該督撫提鎮按品題補
四年領侍衛內大臣等奉

諭旨朕思教育三旗之記名功臣子孫若令伊等在一處讀書則教授之人必不加勉而衆幼童聚於一處亦不得實在肄業將此內二十歲以上曾習清漢書者各與二兩錢糧米石令在部院為貼寫筆帖式該管大臣將優者保奏以筆帖式補用若二十歲以上之不曾讀書者照護軍與四兩錢糧米石令在捕牲執事人處行走優者即可用為侍衛或補授官職其十九歲以下者如在家能延師教訓無容併及其餘每月與四兩錢糧以

為延師肄業之費此次恩施并將大臣等之子孫一體均沾交伊等父兄令將子弟之文武學業加意教訓俟伊等至二十歲時奏聞朕所以如此施恩者凡欲成就功臣之子孫也伊等父兄理宜仰體朕心各自諄切教其子弟庶文武學業俱得漸進以底於成就矣

五年吏部以八旗廕本具奏

上命傳集八旗廕子之公侯伯及官員等宣

諭以承廕子弟年俱幼穉不能辦理部務徒被叅革暫給

三品廕生令其勉力學習成材之日奏聞請

旨

六年以廕子獎督工死事員弁松江府知府周中
鉉山清裏河把總陸章督築吳淞江險工被溺身
故加贈周中鉉太僕寺卿廕一子入監讀書陸章
廕一子以衛千總用

十年

勅陣亡之阿岱等七員均廕一子入監讀書

乾隆元年廣西右江總兵潘紹用無子奏請將堂弟潘紹堯承蔭

特旨允行

三年奉

諭旨我

皇考酬庸念舊特立賢良祠於京師俾我朝宣勞輔治完名全節之王大臣永承裡祀垂譽無窮實自古未有之曠典也賢良大臣之子孫已登仕籍者固多其中

或有不能自振漸就零落之人亦屬可憫朕仰體

皇考厚待耆舊之盛心加特恩一次除現在入祠之子孫
有文官七品以上武官五品以上者已經錄用無庸
查奏外如子孫並無仕宦或有品級而甚屬卑微者
著該部行文各旗都統及直省督撫查係嫡裔擇其
品行才質可以造就者給咨送部帶領引見候朕酌
量加恩

四年定官員草職後不論文武職銜如品秩相當

及在原品以上皆准復還原廕

兵部奏桌子山案內議叙陣亡官弁可否仍准廕
子推用奉

諭旨此案陣亡官弁俱准賜廕

三十四年

諭什狄所立之雲騎尉照依所奏著過繼伊兄什京之
孫訥音布承襲但此項所立之官襲次已完仍賞給
伊子嗣恩騎尉世襲罔替此特矜卹陣亡之人施恩

於其正派子嗣其過繼之子即不應承襲訥音布並非什狄之正派子嗣其應襲雲騎尉襲次已完不必承襲恩騎尉永著為例

又

諭内外文武大臣皆分職任事為國宣力分應子蔭世爵公侯伯等祖父勛庸懋著錫慶承家即照一品子蔭亦與延賞之義相符若子爵男爵之一品二品或先世績本稍微或承襲久而遞減平日並無職任不

過朝期上班及本旗應差不應與內外大臣公侯伯等一體予廕著照雍正二年

諭旨子爵視三品官男爵視四品官下部議行

三十九年

諭前因陣亡員弁深堪軫念曾經降旨於伊等襲職次數已完復著賞給恩騎尉令其世襲勿替著為令其原官之嫡嗣准照此例承襲若係絕嗣撫養兄弟之子者於承襲世次已完時無庸給與恩騎尉今覽正

藍旗滿洲都統進呈承襲原任前鋒校兆海所得之
雲騎尉家譜內開兆海在四川軍營受傷身故由部
遵旨議卹照陣亡之例准襲雲騎尉二次因無子嗣
將過繼伊兄伍什哈達之次子承襲等語此項受傷
身故人員朕因念其勞績與陣亡人等一例議叙給
與世襲已屬格外殊恩若承襲世次已完并給與恩
騎尉則與實在陣亡者無別此等人員如承襲世次
已完不但過繼兄弟之子不應賞給恩騎尉即有子

嗣者亦不應令其承襲嗣後此項受傷身故人等朕特加恩與陣亡人等一體襲職者惟將應襲之官照例承襲無論有無子嗣於承襲世次已完時緊不准承襲恩騎尉著為令

又

諭向來八旗人員身任旗職如遇陣亡等事子孫議給世職其有年未及歲者並照應得世職給與半俸至旗人簡用綠營官員陣亡議卹子孫即照綠營官職

予以廕生其年未及歲者未經議給應得分例第思此等同為旗人雖予廕之例不可易而効命疆場其子孫當幼稚之時養贍無資情殊可憫嗣後無論旗人補用綠營及綠營中漢員遇有陣亡議廕其子孫年未及歲者俱著一體加恩賞給馬糧一分以示優卹維均之至意

四十年

諭向來滿洲人員簡放綠營將佐者遇有應得卹廕其

子弟照綠營例應以營員補用上年經侍郎阿揚阿
條奏以此等人員若概以營員補用恐年少易染習
氣弓馬轉致生疎請由部帶領引見分別旗營兩用
業經八旗大臣會議准行今思此內經引見朕定以
綠營錄用者究屬年幼未經諳練驟放外省既於營
務未諳且一時不能得缺在家守候仍不免於閒曠
莫若令伊等在京營等處學習當差以資造就

四十七年

諭正白旗滿洲都統以隔旗同姓拉世喜之輕車都尉
減等承襲雲騎尉富森布病故照乾隆三十年八旗
王大臣等辦理之例奏請停其承襲三十年八旗王
大臣等請將隔旗同姓子孫承襲之富森布二十員
停其承襲等因具奏彼時朕即降旨現在查出人員
俟出缺之時再行辦理何必預行議定況拉世喜由
班濟之輕車都尉已減至雲騎尉而隔旗同姓之富
森布承襲已經三輩旗人惟賴俸餉度日今若停其

承襲不惟初立世職之人絕其裡祀而出缺人員子孫不得食俸自至拮据實不副朕矜恤旗人之至意著加恩將富森布之雲騎尉交該旗揀選應行承襲人員帶領引見令其承襲嗣後八旗此等隔旗同姓子孫承襲世職如已過三輩者俱著世襲罔替永遠為例

四十八年

諭朕披閱明臣奏議熊廷弼為遼東經畧時抒誠効命

所奏諸疏具見忠鯁而其時主闇政昏不惟不用其
言轉致身罹重辟深可憫惻因降旨查其現在有無
子孫曾否出仕茲據舒常等查奏熊廷弼後裔均以
務農為業惟次支之五世孫熊泗先業儒人尚明白
等語熊世先著加恩以訓導用該督撫即行咨補俟
六年俸滿後如果堪膺民社再行保舉送部引見

又

諭朕披閱明史袁崇煥督師薊遼尚能忠於所事而其

時主闇政昏不能罄其忱悃以致身罹重辟深可憫
惻因降旨查其現在有無子孫曾否出仕茲據該撫
尚安查奏袁崇煥無嗣伊嫡堂弟文炳之子入繼為
嗣現有五世孫袁炳並未出仕等語所奏尚未明晰
袁炳如果文理通順即照熊廷弼裔孫之例以訓導
咨補俟其六年俸滿察其堪膺民社再行保舉送部
引見如僅能粗曉字義人尚明白即以佐雜等官補
用若未經讀書以務農為業即賞給八品頂帶榮身

臣等謹按明臣熊廷弼素崇煥先後守邊備著勞
績明季紀綱不振黨論紛呶是非倒置遂使任事
之臣並罹重辟自經明史論定公議始昭茲復邀
聖主褒嘉錄及後嗣

盛世勸忠之曠典洵與覆幬同符矣

四十九年

諭福康安奏逆回攻擾通渭縣時有告休在籍知縣李
南暉帶領子姪協力守禦城陷罵賊遂為所害其子

貢生李思沆同時被殺伊姪監生李師沆亦即投繯
殞命李南暉著加恩賞給知府職銜並著該部即照
知府陣亡例議給卹廕嗣經吏部遵議李南暉加贈
太僕寺卿准廕一子入監讀書六月期滿照例以
知縣注冊銓選從之

五十年

諭綠營員弁除軍功議叙卹賞仍照舊辦理若陣亡人
員無論漢人及旗人用於綠營者總與旗人一體給

與世職即襲次已完亦應照例酌給恩騎尉俾賞延
於世以示朕獎勵戎行一視同仁之至意尋經軍機
大臣會同兵部議奏請將文職難蔭與武職均歸
一體辦理

一定例旗員先受世爵將陣亡者按其等差加以
應贈之秩合為一爵令其子孫承襲至一等公以
上無爵可加令其嫡子襲其一等公以別子襲嗣
後綠營人員均照辦理

一文武陣亡人員應襲世職俟襲次完時均照旗員例給與恩騎尉世爵

一世職承襲人員令該督撫查明年歲照依旗員之例年已十八歲者送部引

見承襲發標學習准食全俸其年未及歲者給與半俸定因公差委漂沒身故卹典兵部議覆署兩廣總督孫士毅奏廣東吳川營把總傅君召管駕該營在廠修竣戰船駕駛回營遭風漂至外洋擊碎淹

沒身故請照陣亡例卹賞向例大洋大江危險地方凡官兵因公差委漂沒身故者照陣亡例辦理若在内洋内河漂沒身故者照陣亡例減一等辦理近蒙

皇上特恩將陣亡綠營官員照旗員例一體改給世職伏思官員巡洋遭風猝遇不測固屬因公殞命但究與身先士卒効命疆場捐軀鋒鏑者有間若因陣亡廕贈舊例已刪概照打仗陣亡新例議給世

職似無以示區別而昭平允臣等酌議嗣後官員因公差委在大洋大江遭風淹斃及在內洋內河因公淹斃者仍按其官階各照舊例分別給予廕贈卹賞將舊例內照陣亡字樣刪去庶因公身故人員仍得仰沐

恩施而延賞酬庸亦不致倖邀曠典從之

增定軍營立功病故人員卹廕例時兵部將在軍前打仗列為超等未經咨部議叙即在軍營病故

原任遊擊達賴保之子文格照例廕給七品監生
具奏奉

旨令查明向例另行酌議尋議查定例陣亡者照品級
給與世職出征立功未經議叙旋在軍營病故者
照立功等第給予廕監一次似應照舊辦理惟已
經議叙人員向以業經給有功牌功加病故後即
不再議予廕是較之未經議叙得有廕監者轉覺
偏枯請嗣後出征立功在軍營病故人員無論旗

員綠營曾經議叙及未經議叙者均令兵部查核該領兵大臣原保等第一體照例給予廕監從之
吏道

臣等謹按周有府史胥吏漢有郡縣掾之屬即今之吏員也三代時人各以才地自安筦庫之士咸世其家終其身無外慕至漢則刀筆吏或至為宰相封列侯於是乎智計輻輳之士有不嫌以吏道入官者後世文武各途皆資拜獻為士者既不屑

屑于吏其人之年力已長無所成就又不能霑體
塗足束身南畝者徃徃歸于是以資其生自其祖
孫父子居通都大邑日事侈靡勢必因事而有所
索取我

世宗憲皇帝懲其積蠹於是有役滿占缺之禁有回籍候
選之條不使久住京師為滋弊淵藪近年以來

皇上遇事重懲防微杜漸兼之五年期滿議叙得官亦
可以贍其衣食夫治道去其太甚既防其有作奸

犯科亦予之以微勞銓叙立法均平無踰是者謹以吏道出身銓用之法叙列于左

順治五年吏部奏言佐貳雜職等官例由吏員充選今考定者俱經選用而懸缺尚多應令內外各衙門將辦事吏員自順治元二兩年實歷至今者俱確查送部照例考補得

旨允行仍

諭嗣後吏員實歷五年即與考取著為令

十二年吏部議覆山東道監察御史王秉乾疏言
軍前委用官員必詳勘履歷方可給劄有以吏員
出身而經委署府州縣正官者如部選有人繳劄
到部俱應以首領縣佐用永著為例從之

定吏員考職例內外各衙門吏員役滿考職自正
八品以下至未入流十五年分為五等止與九品
以下職銜至康熙三年分為四等一等以正八品
經歷用二等以正九品主簿用三等以從九品用

四等以未入流雜職用分班銓選

康熙五年吏部議覆科臣碩穆科疏言吏員一途雖係微末亦關係國家名器乃竟有冒名頂替之人嗣後各衙門起送年滿吏員應給與印信執照開明年貌籍貫并充役咨部日期付本人收執於畫憑領憑之日送部科查驗以杜頂冒之弊應如所請從之

十五年以考定吏員發往陝西以陝西總督哈占

疏稱平涼固原等處地方已經恢復州縣佐貳驛丞大使需員補用故也

雍正元年都察院奉

諭旨各衙門募設書辦不過令其繕寫文書收貯檔案但書辦五年方滿為日已久熟于作弊甚至已經考滿復改換姓名竄入別部奸弊叢生更有一等缺主名色子孫世業遂成積蠹自後書辦五年考滿之後各部院堂司官查明勒令回籍聽選如有逗留不歸者飭令五城

司坊官稽查遺逐

二年奉

諭旨吏員捐納出身知縣以上官員直省共有幾人著查明奏聞尋查明覆奏得

旨現今查出者其居官優劣之處著督撫出具保結報部如不詳細報明日後發覺將隱蔽之上司一併革職

五年定倉書儒士錄用例吏部議奏京通各倉倉書五年役滿倉糧毫無虧空咨送到部免其考職

以從九品未入流二項兼掣再禮部儒士食糧三年期滿咨送過部免其考職以府檢校典史選用
乾隆五年奉

諭旨前經吏部議覆役滿書吏應飭令回籍其中願就
揀選之人於三個月揀選一次帶領引見將奉旨准
用者註冊俟將來外省請人時派往等語昨日已經
引見一次為數亦止五人朕思此等微員一年之中
頻頻引見亦覺非體嗣後著交與大學士會同吏部

堂官三月揀選一次將姓名奏聞請旨著為例

四十九年吏部疏言從九品款項繁多以吏目為最優捐納從九品人員不得選用吏目獨供事議叙從九品得以兼用未為平允請更定照捐納從九品之例不得選用從

方伎

崇德八年內院大學士希福等以黑星通曉歷法奏用之并賞給房舍衣服等物

順治十二年欽天監監正湯若望九考年滿加通政使司通政使銜

賜二品頂帶仍管欽天監事

十三年太醫院加太常寺少卿仍管院使事韋盡性太醫院加鴻臚寺卿仍管右院判事劉國棟俱考滿加太常寺卿

康熙七年禮部奉

諭旨天象關係重大必得精通熟習之人乃可占驗無誤

著直隸各省督撫曉諭各屬地方有精通天文之人即行起送來京考試於欽天監衙門用與各部院衙門官員一體陞轉

八年授西洋人南懷仁為欽天監監副先是欽天監官按古法推算康熙八年以十二月置閏至是南懷仁言雨水為正月中氣是月二十九日值雨水即為康熙九年之正月不當置閏置閏當在明年二月

上命禮部詳詢欽天監官多直南懷仁乃罷康熙八年十月
二月閏移置康熙九年二月其節氣占候悉從南
懷仁之言授為欽天監監副

雍正七年添設太醫院七品御醫五員其原設吏
目三十員定為八品吏目十員九品吏目二十員
乾隆二年奉

諭旨 在璣衡以齊七政視雲物以驗歲功所以審休咎
備修省先王深致謹焉今欽天監厯象考成一書於

節序時刻固已推算精明分釐不爽而星官之術占驗之方則闕焉未講但天文家言互有疎密非精習不能無差海內有精曉天文明于星象者直省督撫確訪試驗術果精通著咨送來京該部奏聞請旨

三年大學士伯鄂爾泰奏據太僕寺少卿成德欽天監監正明圖等詳籌官學事宜查算法為六藝之一最為纖密肄業必得專功應專立一學即在欽天監附近之地額設算學生三十六名滿洲十

二名蒙古八名漢軍六名漢人十二名滿洲蒙古
漢軍即于八旗官學生內擇其從前學過算法資
質相近而願學者不拘旗分選取漢人無論舉貢
生童或世業子弟具呈國子監移送該學考試秉
公錄取教習之法欽遵

御製數理精蘊次第教授線面體三部各限一年七政共
限二年每季一小試每歲一大試屆期該學會同
欽天監公同考試又算學應額設助教一員教習

二員卽于現在奉停算法教習十六員之內揀選其助教揀選如何補用及期滿議叙應交部議算學生學有成效自不應選用別項應考用欽天監衙門應用各缺亦請交部議定又新設算學必得通曉算法之大員經理其事請交順天府府丞梅穀成原任侍郎何國宗協同太僕寺少卿成德管理從之

又禮部奏浙江杭州府生員張永祚通曉天文明

于星象應令其在欽天監天文科行走奉

諭旨張永祚著授為欽天監八品博士

皇朝文獻通考卷五十四

欽定四庫全書

皇朝文獻通考卷五十五

選舉考九

舉官

臣等謹按馬端臨舉官考有云三代兩漢舉士與舉官合而為一士之獲舉未有不入官者也至唐以試士屬禮部試吏屬吏部於是科目舉士銓選舉官區為兩事至吏部主文選兵部主武選則舉

官之內又分兩途竊見晉時山濤甄拔人物各為
題目號稱啟事夫以天下人士仰品鑒於吏曹以
俄頃之周旋定才行之優劣甚至鑽營倖進權在
私門晉唐以來宋金元明千數百年此弊未革我
朝創業之初

詔求賢俊凡員勒以下咸得各舉所知即一介之微亦得
以其所識薦達

御前並邀錄用我

聖祖仁皇帝立賢無方兼收並採惟停止會推之例以杜絕黨援

世宗憲皇帝時屢

詔廷臣薦舉或密緘書名或露章奏達

溫綸疊下公聽並觀蓋舉賢之途既廣則事出於公非如往代九流人物衡鑒之權盡歸銓部俾海內賢才決於掌選者一人之耳目也我

皇上御極以來權衡銓次損益因時滿漢文武職官各

得其叙凡選法之畸輕畸重者斟酌調劑必合乎
審量之平自是注品有崇卑序次有前後例之所
定一成而不易雖其親暱不得以意為重輕而吏
胥之徒亦無從舞弊誘惑選人此則我

朝之大經大法度越漢唐垂萬世而無弊者也臣謹

依類編次備舉官之典故云

太祖高皇帝乙卯年奉

諭旨君天所立也臣君所任也爾諸臣敬念乃職凡有賢

才可任國政者知之勿隱國務殷繁必得賢才衆多量能授職倘治國治兵經理乏才何以濟事故勇能攻戰者宜令治軍才優經濟者宜令理國博通典故者宜詔得失嫻習儀文者宜襄典禮若茲賢才當隨地旁求俾列庶位是時

上既削平諸國每三百人設一牛录額真五牛录設一甲喇額真五甲喇設一固山額真每固山額真左右設兩梅勒額真初設有四旗旗以純色為別曰黃

曰紅曰藍曰白至是添設四旗參用其色鑲之共
為八旗

特命羣臣選舉賢才以備任使

天命十年奉

諭旨大臣身秉國政知有公忠之人雖仇勿隱當直指其
善知有姦慝之人雖親勿護當直指其惡蓋公忠之人
當國家締造時身歷艱險創立功名輔成大業固當身
履榮顯澤及子孫姦慝之人當經營國事之日借端委

謝避害全軀逮國運昇平反欲先蒙其利此宜預設防
維母使遂其巧詐夫國豈常憂患必有安樂之時惟能
憂其憂乃能樂其樂也

天聰三年

上選用儒臣分班侍直巴克什達海同筆帖式剛林蘇開
固爾瑪琿托布齊等四人繙譯漢字書籍巴克什
庫爾纏同筆帖式烏巴什查素喀瑚球詹霸等四
人記注

本朝政事以昭信史

八年甲喇章京朱繼文之子延慶奏曰臣聞時不當進而進者謂之棄身時當進而不進者謂之棄時伏覩

皇上東服朝鮮西滅察哈爾餘孽惟明人耳今秣馬厲兵行將馳驟中原實大事將成之時豪傑効力之日也臣思我國之攻城破敵斬將塞旗者實不乏人守境治民安內攘外者槩未多見往年遵化永平

之役得有四城而隨以鮑高寧范分守其地假使
再獲數城即揀擇於漢官中而倉猝之際恐難名
實相稱也大抵揣摩於平日者庶可擔當於一旦
而不靡臣又聞盡忠莫如進賢故陳平非魏無知
不得封列侯管仲非鮑叔牙不得為伯佐此猶往
蹟即今事亦有可矜式者寧叅將以貝勒家僕薦
舉數人一從征俱獲顯官固伊等之才能超軼亦
皇上釣餌賢豪之計善也臣實庸愚不敢自薦臣有二友

又不敢自隱今畧言其行止伏惟

睿鑒終三下陳極新剛果鄭重明理知幾且友於弟孝於
母一家藹如能治其家未有不能治其國者也刑
部啟心卽申朝紀溫雅正直練達世務處家儉而
守身約訥於言而敏於行視之若木實足肩鴻任
巨也茲二人者雖不能跨步前儔亦足尾其後塵
皇上召至御前詢以時務攜之從征試以任使倘若臣言
差謬願甘欺罔之罪臣又聞建大厦者非一木之

力成大功者非一人之畧是以臣竭忠冒死而有
此奏

上覽畢召朱延慶並所舉陳極新申朝紀至謂延慶曰爾
所奏之言俱善凡人建言必實指曰某也賢某也不肖
於任國政諸大臣必實指曰某大臣能稱厥職某大臣
惟利是圖某徇庇所私之人某傾害所惡之人務直指
其名以奏凡人於國之賢才皆得薦舉毋曰何賢才如
此衆多朕猶以為未足也爾等知其賢而舉之使或變

其初心後為不善亦彼自為不善耳於舉者何與焉今朕將錄用爾等於是令延慶陳極新於文館錄用以申朝紀原係部臣仍令在刑部辦事

九年奉

諭旨爾滿漢蒙古各官暨凡有識見人知才堪任事者即行舉薦勿分新舊或已仕未仕但有心術公正克勝任使之人呈送吏部有通曉文義心術公正足備任使者毋分已仕未仕呈送禮部該部員勒奏聞朕將量才酌

用才全德備之人豈能易得但能公忠任事則善

崇德七年新設漢軍八旗選官補用始編漢軍為
八旗各設牛录章京

上諭曰漢軍旗內新設官員應用之人賢否朕未悉知著
該部王大臣同漢軍固山額真梅勒章京等遴選用之
於是多羅睿郡王多爾袞鎮國將軍承政阿拜叅
政滿朱錫禮啟心郎索尼等與漢軍固山額真梅
勒章京公同遴選請

旨補授

順治元年順天巡撫宋權獻治平三策一廣羅賢才以佐上理併薦故明薊遼總督王永吉等旋

飭廷臣各舉所知於是天津總督駱養性侍郎王鼐永左春坊左庶子李若琳吏部左侍郎沈惟炳等並有薦舉令詳註履歷陳奏下部知之嗣以廷臣所舉類多明季舊吏及革職廢員未有肥遯山林隱跡逃名之士令自今以後須嚴責舉主所舉得人必

優加進賢之賞所舉舛謬必嚴行連坐之罰至於
薦舉本章止許開具鄉貫履歷其才品所宜應聽
朝廷定奪不許指定某官坐名何地無論貴賤遠近隱顯
升沈果有灼見真知悉許薦舉倘以貨郎襍流市
傭村叟及革黜青衿投間武弁妄充隱逸以致流
品不分選法壅滯如前朝保舉故事咎有所歸若
畏避連坐因而緘默不舉者亦必治以蔽賢之罪
六年大學士洪承疇奏言平治天下之道在於各

省督撫總兵俱得其人欲用得其人宜實行保舉
連坐之法如督撫總兵員缺令吏兵二部滿漢堂
官詳加評註自書姓名保舉再以諮詢左右大臣
議論相合方行點用俟後有功效保舉者受薦賢
之賞若曠職債事保舉者受妄昧之罪庶封疆民
生兩有攸賴得

旨嗣後用督撫提鎮著內院九卿會推若有獨知灼見情
願保舉者許自行保舉得人者陞賞誤舉者連坐

又刑科給事中陳調元奏言朝廷之賞罰惟憑督按之舉劾而舉劾之公私全憑道府之開報乃有督臣所薦即按臣所劾者疏內皆云據司道開報夫一人也一以為大賢一以為不肖一揭也忽而加諸膝忽而墜諸淵夫朝廷用人止此舉劾以為察吏致治之本而舛錯至是則督按之耳目安寄國家之賞罰何憑伏祈嚴飭確核開報同異之弊立加處分庶勸懲當而吏治清矣下部院察議

又吏部尚書陳名夏等奏言舊例各省道府州縣等官俱俟三年考滿方准陞遷今地方需人若必待考滿勢難懸缺應將各省道府州縣等官歷俸三年撫按有薦者酌量推轉從之

九年大學士范文程等疏奏翰林詹事等官陞補畫一之法修撰編修檢討按科分先後資序陞轉凡奉差及終養丁憂治喪依限到京者仍照科分資序違限者計所違月日序於後給假告病者槩

序於後降補別衙門復回者俱照現補官品為序
永著為例

又吏部奏言通判員缺除裁減外所餘不多而
節年貢生考定應授茲銜者積至八百餘員
挨次銓補其或終身無望請照品改授布政
司經歷正副理問按察司經歷知事布政司
都司運司經歷運判各府經歷京縣外縣丞
外銜經歷等職仍支正六品俸照通判資格陞轉

以疏壅滯從之

又奉

諭旨銓部職司用人凡有銓選應用才能令朕聞有援引親黨及納賄營私者此風斷不可長嗣後務矢公忠慎擇才能選授使庶司百職俱得其人則朕心安而部臣亦得自慊矣

十年工科給事中劉顯績奏言自古帝王左史記言右史記動期昭示當時垂法後世乞設立記注

官凡有

詔諭及諸臣奏啓

皇上一言一動隨事直書存貯內院以為聖子神孫萬世

法則報聞

十一年奉

諭旨朝廷設內外諸司所以代天工理庶務無論文武衙門大小官員各有責任聞官多缺員皆因吏胥作姦朦混沉壓上下其手竊弄事權求索賄賂吏胥之弊司官

不舉司官之弊堂官不察因循延緩日復一日以致弊
實叢生甚至有頻年困頓流落旅邸不得一官者人才
淹抑政事廢弛皆此之故今後爾等兩部務須正己率
屬剔弊釐姦各該司官務洗心滌慮奉公守法毋得縱
役夤緣仍蹈前弊以取罪戾滿漢各官當互相砥礪勉
圖職業將現在內外文武大小員缺作速詳察盡行推
補務俾人才効用政事修舉稱朕承天愛民至意

又奉

勅選舉漢軍內外官員有才學品行者數員

又奉

諭旨朕念時方用人才不易得不忍以一言偶誤遂致沉
抑前有恩詔詿誤官員許該衙門奏明寬宥未盡奉行
向來科道各官有因條陳國事所言不當以致降級革
職或因糾參內外官員事虛反坐以致降級革職者爾
部詳察始末緣由明白開列進奏吏部開列科道言事
不當革職者具奏得

旨復原官者六人

工科給事中張王治條奏六曹除吏部外禮兵則陞道員戶刑工則陞知府同隸部屬事有異同嗣後並宜道府兼陞從之

十二年吏部議覆吏科都給事中朱徽疏言吏部司官一年內陞一人外轉一人科員一年內陞二人外轉二人御史二年內陞三人外轉三人司道除陞巡撫外每年亦內陞三人其司道內陞滿洲

不論科目漢人仍以科目出身為限必查其曾舉
卓異俸薦俱優者方准內陞此外若又有缺出則
以在京衙門應陞之人補用從之

又奉

諭旨知府乃吏治之本其最要者如直隸之真保河間江
南之江寧淮揚蘇松常鎮浙江之杭嘉湖紹山東之濟
南青兗山西之太原平陽河南之開封彰德陝西之西
安延安江西之南昌吉安湖廣之武昌荊襄福建之福

州泉州共三十府或政事殷繁或地方扼要著在京各衙門滿漢堂官三品以上及在外督撫各舉才行兼優堪任知府者一人詳開履歷事蹟具奏吏部再加察議奏請定奪以備三十處知府之用歷代州縣之制自漢以來皆以人戶分大小隋有開劇衙要之等唐有赤畿望緊之差明時因之酌為繁簡定有成例隨才器使各盡其用著吏部詳察舊例叅酌時宜將地方分為三等具疏奏奪應選官員考其身言書判精加揀擇亦各三

等具奏上等者列名引見候朕面定方將上等之缺從公掣籤其考居二等者授二等地方三等者授三等地方不必引見俱從公掣籤務使州縣各官人地相稱至有司賢否全憑督撫舉劾近乃上下扶同以餽遺之厚薄情面之大小顛倒貪廉吏治因之大壞以後責令司道府推一應官評務要細開事蹟轉報督撫逐件確核如開報不實即先指名題叅至督撫止憑開報不親自體訪覈實以致賢否混淆事發一體究治

臣等謹按唐開元中定天下州府以近畿為四輔
其外為六雄則鄭陝汴絳懷魏六州是也又為十
望宋毫滑許汝晉洛虢衛相十州是也元有上路
下路之別有上縣中縣下縣之分明有上府中府
下府之等縣亦如之張九齡論唐時以牧守之任
為斥逐之區宋天聖間令選猥下士大夫輕其選
或選而不注者有之我

朝定鼎之初首重民事是以守令之任慎選其人於

各省府缺最要者凡三十府預為簡擇以備任使
蓋其時真保河間及太原平陽西安開封所轄最
廣餘皆各省繁重之區於天下知府中為最劇非
才力素優不足以勝師帥之任縣分三等各視其
所考之等授之

國初時吏部注選

世祖章皇帝

特令上等之缺列名引

見恭候

欽定由是

列聖相承凡郡守牧令之選奏名

廷陞無不引

見之員各省府州縣定為衝繁疲難等缺有四字相兼者
有三字者有二字一字者知府員缺有請

旨者有部選者部選中又有繁簡之不同例得於授官
後及報最時具摺謝

恩請

訓

召見殿墀於部選初授者觀其應對以覘異日之政聲
凡督撫保題者詳其任內實蹟所至地方情形以
徵治行之優劣其稱職與否總莫逃

洞鑒焉至於牧令籤掣後繕寫名籤

聖心簡別量予調補及抵任時各省要缺仍令督撫可
以專摺奏請更調蓋斟酌衡量因時因地各得其

宜而郡縣官人之法於斯為大備焉

又吏部遵

諭議奏在外官員應陞州縣者其身言書判無從考察今後凡司府首領州縣佐貳及教職等官中有堪任上等者該督撫巡方特薦臣部覆核無異方陞上等之缺其尋常俸滿有薦應陞州縣正官者舊人不論科目漢人進士舉人俱以中缺補用其俸滿無薦者舊人及漢人進士舉人並貢士俱以下缺

用從之

又吏部奉

諭旨國家官人原當內外互用以勵羣材近見外官內轉
京官外任者多能稱職宜再行互用除翰林官員朕自
裁定其六部卿寺等衙門官員有才優經濟堪任養民
者著各堂官開列六科官員著吏科開列各道御史著
都察院開列通送吏部會同都察院察核速奏其在外
司道等官品行著聞政治卓越者確察實蹟遇缺內轉

務使內外得人職事修舉以副朕圖治安民至意旋以
侍郎等官及科道官俱傳

諭親加裁定分別酌用遇缺即補吏部議翰林官外陞職
銜正詹以布政使用支正二品俸少詹以布政使
用侍讀學士以按察使用侍讀中允以叅政用編
修檢討以副使用侍郎副都御史通政使大理寺
卿以布政使用支正二品俸太僕寺少卿順天府
府丞以按察使用光祿寺少卿以叅政用六科左

右給事以副使用給事中以叅議用監察御史以副使用從之

又吏部奏考選御史舊例在內則用中書行人評士博士在外則用俸深累薦推官知縣如急缺乏人則取厯俸二年以上中行評博及各部主事等官奏明請

旨今科道缺員太多應將在內中行評博及五部主事厯俸二年以上者咨取考補十員餘缺於在外推知

內查歷俸三年薦有三次者咨取考選至內院中書應否考選伏候

上裁得

旨內院中書不准考選科道著為令十五年七月以行取各官未到暫於各部郎中員外主事察取才品堪用者改授御史至十七年四月議准俸滿中行評博與俸滿未經考選陞主事者一并開列職名與行取推知一體考選

又都察院題請考補順天巡撫按得

旨此員缺著照例察取應考官員候朕親選以後科道官
考選差遣內陞外轉俱候朕裁定永著為例

十三年吏部議覆管尚書事王永吉疏言考選本
部司官遇各省缺出於外取俸深有薦及卓異推
知於內取中行評博及五部主事未經考選者一
同選試從之

又停保舉優陞大府知府例

十四年奉

諭旨向來屢次考選俱行取俸深保薦有司其乙未科進士外任各員因資俸在後行取未及今著於乙未科進士推官知縣內詳察年力精壯能修職業者行取來京朕親加考選酌用

十五年吏部議覆科臣姜希輒疏言凡應陞補方面各官投文到部必隔三推方許推補以杜擇缺趨避之計至陞授知府定例遇知府缺出查內外

應陞官陞補遇道府缺兼出俱選郎中但郎中數少各府同知及知州并加級知縣數多未免壅滯今議一道一府應選郎中如知府缺少照道缺分配陞補郎中外其餘府缺仍以內外應陞官陞補從之

十六年吏部定議翰林官外轉例除侍讀學士侍講學士以上照常陞轉外侍讀以下應照科道例每年外轉二員春季一員秋季一員侍讀侍講以

參政用修撰以副使用編修檢討以參議用從之
又吏部奏言降級候補官員或有人無缺或遇缺
出品級同而降補之人出身資格不同碍難遽補
應俟人缺相當補用得

旨官員初授應照出身資格既經降處著遇缺即補不必
仍論出身資格

十七年吏部奉

諭旨巡按御史職司察吏安民所屬官員差滿例應薦舉

近覽部覆福建按撫李時茂舉劾方面疏稱道員宋杞等厯俸俱未滿一年李時茂方任巡方薦舉定例豈有不知今違例濫及殊屬不合著嚴加考核議處宋杞等不應薦而獲薦其中豈無請託情弊著一併嚴察議處嗣後違例薦舉者并所薦之人俱照此例一體嚴加處分

十八年定沿海之地照邊俸陞轉浙江台州府屬之臨海黃巖太平寧海温州府屬之永嘉樂清平

陽瑞安寧波府屬之鄞縣奉化定海象山俱作邊
俸其三郡之道府廳各員一體照邊俸陞轉

又吏部奏巡按已經停差其地方事務俱交巡撫
管理今議定巡撫薦舉額數順天巡撫應薦方面
官一員有司佐貳官共三員教官三員保定巡撫
應薦方面官一員有司佐貳官共五員教官五員
江寧巡撫應薦方面官二員有司佐貳官共三員
教官三員操江巡撫應薦方面官一員有司佐貳

官共三員教官三員鳳陽巡撫應薦方面官二員
有司佐貳官共四員教官四員山東巡撫應薦方
面官二員有司佐貳官共六員教官六員河南巡
撫應薦方面官三員有司佐貳官共七員教官六
員陝西巡撫應薦方面官四員有司佐貳官共七
員教官六員甘肅巡撫應薦方面官一員有司佐
貳教官共二員延綏巡撫應薦方面官一員有司
佐貳官共二員教官一員寧夏巡撫應薦方面官

一員有司佐貳教官共二員浙江巡撫應薦方面
官三員有司佐貳官共六員教官五員福建巡撫
應薦方面官二員有司佐貳官共四員教官四員
江西巡撫應薦方面官三員有司佐貳官共五員
教官五員南贛巡撫應薦方面官二員有司佐貳
官共三員教官二員鄖陽巡撫應薦方面官一員
有司佐貳官共二員教官二員湖廣巡撫應薦方
面官四員有司佐貳官共七員教官六員偏沅巡

撫應薦方面官三員有司佐貳官共四員教官三員廣東巡撫應薦方面官三員有司佐貳官共六員教官六員廣西巡撫應薦方面官二員有司佐貳官共四員教官四員四川巡撫應薦方面官三員有司佐貳官共七員教官六員貴州巡撫應薦方面官二員有司佐貳官共三員教官二員雲南巡撫應薦方面官三員有司佐貳官共四員教官三員漕運總督應薦方面官七員有司官十六員

佐貳官六員著為例從之

又吏部議選官之法無論進士舉人等項核定職銜縣令在籍候選其赴部點卯近例一切停止吏部查照年月先後挨次掣選發憑各省巡撫催令赴任候選各官有丁憂病故患疾等項應令該撫隨時報部以憑註冊扣選免致選後更張旋復經議定候補內外各官一槩准其回籍照名次先後題補凡候選候補裁缺起復降調等項京官以奉

旨之日為前後外官以咨文到部之日為先後挨次叙用從之

又定吏部掣籤例大選急選之日吏科河南道各滿漢官一員赴部驗明缺籤公同封固吏部堂官掣名籤科道官掣缺籤

康熙元年定部屬內陞并考選科道例六部漢郎中照科道官例每年內陞四員春秋二季開列每季二員科道員缺將各部司官考選停止推知中

行評博開列各部主事員缺將推知等官推陞
二年浙江道御史張吉午疏言三年考滿之法一
二等稱職者即係薦舉應將督撫二年薦舉一次
之例槩行停止從之

又

上以武官職任緊要居家候選懸缺遲久仍令單月投供
雙月選授如投供不到者雖名次在前不准選授
又定投供銓補例舊例凡缺出於十二日以内に到

部者作本月之缺十三日以後到者作下月之缺
雙月大選於單月十五日投供點卯單月急選於
雙月十五日投供點卯至是奉

諭旨大選急選投供日期若距選期太近揀選出缺美惡
易於滋弊以後改每月初一日投供自投文到部後隔
一選銓補初選官投供結候補官止投原籍印結俱令
親身赴部

三年奉

諭旨凡官員較俸推陞衙門相同即與同品官較俸但衙門品級各有大小不便一體較俸應另行定議尋議大學士缺以各尚書左都御史推補如不用以各部侍郎學士推補各部尚書缺照衙門次序以尚書左都御史轉補如不用以各部侍郎推補吏部侍郎缺以各部侍郎轉補各部侍郎缺以學士左副都御史通政使大理寺卿宗人府府丞推補如不用以府尹太常寺卿推補左副都御史缺以通政

使大理寺卿宗人府府丞推補如不用以府尹太
常寺卿推補如不用以光祿寺卿推補如不用以
左通政推補通政使大理寺卿缺以府尹太常寺
卿推補如不用以光祿寺卿推補如不用以侍讀
學士左右通政大理寺少卿照考語俸次推補府
尹太常寺卿缺以光祿寺卿推補如不用以左右
通政大理寺少卿推補如不用以太常寺少卿鴻
臚寺卿太僕寺少卿督捕理事官照考語俸次推

補光祿寺卿缺以左右通政大理寺少卿推補如
不用以太常寺少卿太僕寺少卿鴻臚寺卿督捕
理事官照考語俸次推補其小四品京堂缺將每
年內陞京官四員用完後用五品京堂官一員再
用內陞司道一員得

旨學士既推陞侍郎以後大學士缺停其推用

又定漢官陞轉例先是吏部以補授總督巡撫通
政使府尹光祿寺卿此數員缺奉

旨不論漢軍漢人已經遵行嗣以內三院大學士六部尚書以下鴻臚寺少卿以上漢缺陞轉擬奏下議政王等會同酌議凡陞補在外各官既不論漢軍漢人應將在內各官亦不必分別漢軍漢人今後補授內院大學士六部尚書以下各項員缺停其分別補授將漢軍漢人一體陞轉得

旨堂官員缺漢軍官員每衙門不得過一員

四年定八旗部屬授官例各部員外郎照該旗分

較俸次補授郎中不必照旗分將八旗各部官員
不論俸次選有才能者補授

又吏部議准截留官員照例挨次取選應令於單
月初一日親身赴部投遞互結以便稽查至候補
裁缺改補丁憂服滿降調并革職還職降級還級
各官投文到部俱隔一選銓補以杜規避因該地
方官已有印結免其互結臨補選時照文到先後
挨次籤補投文時令親身到部其各項官員在京

遇有丁憂亡故等項取京官印結預行投部扣選
至臨期以患病具結者概不准行在外丁憂患病
亡故者該府州縣官速行查明報部以便扣選若
不行預報即指名題叅如該督撫不行查出亦治
以疎忽之罪

五年定分班陞補主事例行人司司副內院典籍
辦事中書兵馬司指揮光祿寺署正鑾儀衛經歷
國子監博士助教與知縣為一班大理寺評事太

常寺博士中書科中書行人司行人內院撰文申書順天奉天推官通政司經歷上林苑監丞國子監監丞為一班分推補用主事

六年山東道御史王伯勉疏言推陞知縣舊例用監生生員吏員出身佐貳揆陞臣思縣今為民父母此輩豈能勝任若謂人材或有可用請飭各省督撫廉訪佐貳中果有才能出衆堪任民社者保舉陞授如無保舉者仍以閒散陞用倘徇私濫舉

事敗即坐以徇庇之罪下部議行

又御史李文熙疏言各部郎中陞補府道定例每月府道缺並出始令掣籤補授今道缺已裁十分之七郎中銓授無時嗣後請出有府缺即令陞府有道缺即令陞道得

旨以後遇推陞之月不必分別道府著照所出之缺內外應陞官均平推陞

又貴州道御史高坪疏言州縣離任勢必委官暫

署此定例也乃有督撫委用者亦有司道請委者
臣愚以為委署之事宜專責成知府而行保舉連
坐之法蓋一郡之官惟知府熟見其才品而稔悉
其臧否且錢糧皆關知府考成則擇人署篆尤其
職掌之所最切嗣後有應委署者務令知府於所
屬慎擇賢能之吏詳呈督撫嚴行察核果堪稱職
方准委用倘有徇庇將知府並劾則人知自愛而
署理可清下部議行

七年吏部奉

諭旨國家政務必委任賢能乃可贊成上理今在京各部院滿漢官員俱論資俸陞轉雖係見行之例但才能出衆者常以較量資俸超擢無期此後遇有緊要員缺著不論資俸將才能之員選擇補用

又吏部奉

諭旨舊例科道之員行取在外有司考選補授原因有司乃親民之官諳悉民間利弊得以據實指陳有裨政治

且外官內擢足以鼓勵人才振興吏治今後科道缺出可移文督撫就有司內舉賢能夙著者咨部爾部詳核具題行取來京朕親選用每歲宜行取幾人爾部酌議以聞尋議行取知縣既咨行各省令將才能夙著者選送若預定員數或人不及額而庸沔得以濫充或人浮於額而賢者無由盡舉嗣後應停其定數凡知縣內有卓異薦舉無錢糧盜案者列名咨送如無卓異薦舉之員將歷俸三年無錢糧盜案才能

夙著者令該督撫詳細選擇列名咨送臣部詳核
具題行取來京考選以科道用者註冊以次題補
用完之日再行具題行取若無才能官員不必充
數濫送督撫有咨送非人及錢糧盜案未結之員
者治以徇情之罪從之

八年刑科給事中張登選疏言提鎮統轄將領捍
衛地方其權甚重不可不公用選擇請照順治年
間定例提督總兵官仍著九卿會推開列恭候

簡用至武官功績令兵部逐一詳開九卿會同查核則無功者不致倖進矣得

旨提督及總兵官統轄邊疆地方關係重大以後缺出將應補授官員兵部冊內所載功績逐一開列著九卿科道會推

又廣西道御史戈英疏言近者銓部復行寄憑之法其弊匪一有緣事已故而仍選者有懸缺一二年者有人南缺北寄憑赴任往返萬餘里者有在

籍物故地方官失於詳報致叅罰受累者有業經
報部憑已先發咨回另選者種種遲誤難以枚舉
且在籍候選其人之衰老病廢部臣何由得知及
曠職誤事始行叅黜貽害已多與其叅黜於後何
如慎簡於先況在京候選者見奉有投供點卯該
部詳閱老病之例掄才器使莫善於此臣以為在
外候選各官亦宜倣行此法請查覆舊章停止寄
憑槩令赴部投供點卯仍飭部臣詳閱斤汰衰邁

庶銓選得人而事理可垂久無弊下部確議尋議嗣後凡初授官員約計一年內缺出多寡將奉

旨即用併年分在前者截取令人文到部候選其候補官員原無截取之例亦令人文到部始行補用從之又兵部奏各省提鎮所關甚重以後提督缺出應將八旗副都統現任總兵官內論俸分缺推選其阿思哈尼哈番阿達哈哈番既令陞補副都統叅領遇提鎮缺出應停止推選從之

又吏部奉

諭旨朕思部院事務殷繁諸司官職掌必得賢能方克勝任今爾部但就部院現任官員調補其隨旗上朝者豈無賢能可備擢用乎可諭滿洲漢軍都統副都統等於輕車都尉以下雲騎尉以上有明習滿文或通曉漢文夙具才幹堪任部院者從公詳擇一旗數員咨送爾部俟各旗缺出與應陞者並題補用

九年兵部奏近見總督提鎮每遇標員缺出不問

地方緩急不論銜缺相當輒將標員坐名題補其中恐有情弊且使厯俸年久及在部候補之人益多壅滯請飭該督提鎮嗣後將副將以下守備以上缺出實係近海沿邊巖疆果屬人地相宜酌量題補外其餘員缺不得概行題補從之

又定推陞大選例凡推陞大選缺出將雙月所出之缺彙算如出十缺陞補二人大選八人如出七八缺陞補一人餘缺俱歸大選仍註明冊內與下

月所出之缺合計陞補

十年停止會推陞之法順治九年議准尚書侍郎都御史副都御史宗人府府丞通政使大理寺卿內閣學士掌院學士等官俱由會推至是停止將應陞轉各官開列具題凡九卿京堂翰林吏部科道內閣中書及在外布按鹽運使各官遇缺當補即行單題凡部寺屬官及方面有司佐貳雜職缺出掣籤逐月景題是時惟外省藩臬間一奉

旨推舉至五十一年盡行停止

臣等謹按會推之制始於明時定制之初未始不以登明選公為說迨其後則仍以一二有力大臣搃其魁柄而下此皆附和之有異議者中以他法亦無能自辨此正昌黎韓愈所云大官臆決唱聲萬口一辭者也沿至故明末造以政府廷推黨同伐異爭勝負於口舌之間元黃反覆而國勢隨之我

朝

祖

宗以來乾綱獨斷綜攬化權當闢門籲俊之時未嘗不博採遠詢廣求賢哲而欲以同聲標榜互為進取之地則有所不能蓋至是凡大學士尚書左都御史侍郎副都御史宗人府府丞國子監祭酒等員缺暨直省總督巡撫停止會推將應陞應轉各員開列具題恭候

欽定諸臣心跡已體察於平時而

聖主權衡更折衷於臨事既省公私之傾軋并無恩怨之牽縈而黨援門戶之風亦從此永息矣

十一年吏部議覆河南道御史嚴曾槩疏言凡異途出身之人不得以正印官用果有才能稱職之員該督撫特疏保舉吏部方以正印推陞此定例也但保舉異途人員不開列事實恐庸才得以冒濫請嗣後令督撫於疏內開列事實以憑查核應

如所請從之

十二年吏部奉

諭旨向來定例外官告病不准起用原以防其規避但其
中才品優長政績素著者迫於一時至情引例告歸終
身棄置深為可惜宜令地方督撫確行咨訪果有才品
堪用者據實保奏以憑擢用

又吏部兵部奉

諭旨國家用人宜先沉靜之才人臣服官首重廉恥之節

邇來文武官員或因不得陞遷或因不與差遣輒稱冤抑紛紛控告不過圖便已私原非從公起見縱屬應陞應差而自為辨白希求榮利廉恥之道已虧豈能修舉職業克副任使理宜嚴禁以肅官常

十三年准四川省知府以下員缺聽該督酌量題補

十四年吏部議覆刑科給事中劉沛先疏言直隸各省行取知縣督撫薦贖有卓異有薦舉有才能

列為三項而京官考選獨無差等請於各衙門咨
送時論俸之中分別等第密咨開送應如所奏嗣
後科道員缺行取在內五部主事中行評博俱令
該衙門堂官於俸滿官員內開送賢能之官如濫
送者照督撫濫舉之例處分從之

十五年停止陝西十五年薦舉以地方新復官屬
未經詳察從督撫等請也

停止浙江十五年薦舉以連年用兵新任之員未

能即定賢否從督撫等請也

十六年吏部議覆雲南道御史陸祚蕃疏言河道
關係重大必得才能熟練之員始能勝任嗣後凡
河工道員缺出內而部屬外而知府同知果有曾
任河職盡心河務者令總河保題其未任河職才
品優長該督所深悉者亦許題請至現任河員果
能盡心河務俸深陞授他職者許以陞銜題留原
任陞轉時仍照所陞之職陞用應如所請從之

十七年都察院右副都御史金鉉疏言向因用兵各省需員甚急故聽督撫坐名題補惟地方最緊要者聽其保舉題請近見保舉一人不曰輕車熟路則曰人地相宜既有保舉字樣不得不從臣恐效尤奔競徇情百出嗣後除用兵地方仍聽督撫保舉外其不用兵凡題補保舉應行停止疏入下部議尋議非用兵之地無得保舉題補其保舉之官如有不稱職者仍治督撫濫舉之罪從之

十八年都察院左都御史魏象樞疏薦清廉十人
得

旨依議補用原任知縣張沐陸隴其係保舉廉能之員如
直隸清苑江南無錫等縣最稱繁劇難治必用之此等
地方庶其才可以表見

十九年四川道御史張志棟疏言各部主事不係
正途出身者請令各部堂官保舉方許陞轉九卿
議不准行

上曰各部主事日後皆陞道府與其俟為道府後令督撫保舉何如為主事時即令堂官保舉之為愈耶今後應令不係正途出身之主事歷俸三年果能勝任該衙門堂官保舉方許陞轉

二十年

諭大學士等曰科道官職司耳目行取知縣內如有曾受偽職之人名義已壞科道不當選用爾等識之

又吏部議覆湖廣道御史房廷楨疏言捐納歲貢

終非正途不應考選科道應如所請又督撫子弟
應照在京三品京堂子弟例亦不與考選應不准
行得

旨漢軍漢人捐納歲貢俱不准作正途考選京官三品以
上子弟既不與考選總督巡撫子弟亦不准考選
又奉

諭旨行取官員吏科已經引見其各部主事等漢官朕尚
未知其人科道為耳目之司選擇不可不慎爾等即傳

諭九卿詹事科道令各舉所知將居官潔清辦事才能者從公保舉不可以同年同鄉親黨徇情私保即督撫所舉不當亦著指陳勿隱

二十一年定學道內陞一員時河南等六省學道督撫皆以公明尤著保舉科臣奏請下部確議定額部議嗣後各省學道令督撫於三年報滿以公明尤著保題吏部開列

欽定一員以京堂錄用其餘陞一級以道員先用其未經

保題者仍照現行例行從之

二十二年奉

諭旨凡職官論俸次陞用若越次用之則俸得者必多況希圖速遷者必非安常守分之人耶

又吏部奏舊例按察使員缺由布政司叅政陞任今推叅政副使內合例之人甚少難以選擇嗣後按察使員缺將四項道員不論厯俸已滿未滿有無罰俸一體會推從之

二十三年大學士奏遵

旨傳諭六部應補闕差保舉開送今六部俱云若保舉辦事有才及謹慎者尚有其人至於操守知之實難

上曰清操如何可廢凡貪犯之人有應坐之罪如郝洛居官甚好然猶侵蝕錢糧數萬魏象樞曾薦郝洛此等情事安能預知朕皆信其清操而委任之各衙門官員或謹慎有守或生事奔競豈有不知者但將有守之人舉出則被舉者自能效力尋九卿詹事科道舉出吏部郎

中蘇赫范承勲江南學道趙倫揚州知府崔華充
州知府張鵬翮靈壽知縣陸隴其

上曰格古德陸隴其向聞其居官甚好今俱各稱善但從此操守不改方為真實好官

又山西道御史張佳疏言學道應令九卿會同保
舉列名上請得

旨學政關係文教造就人才各省各官必品行優長者方能稱職應不拘定例將內外各由進士出身官員作何

選擇補授著九卿會同確議尋議嗣後停其論俸補授
順天學政應將侍讀諭德開列江西浙江學道缺
應將侍講洗馬亦概行開列其餘各省學道缺將
應陞之五部郎中及叅議知府等官選擇開列恭
請

簡用從之

二十四年奉

諭旨九卿詹事科道令其會議會推本期至公至正務得

其實今閱九卿會議之事間或不據實具議草率苟且因循而行有此一次立議爭勝以冀下次不與相拂而從之者或有此一次將彼意中之人薦出冀下次將其親朋薦出以相報者或有薦其門生者有薦其同年者有薦其同鄉親友者夫九卿會議會推理宜虛公持論豈可一二人專擅以行爾等齊集滿漢九卿大臣傳諭申飭之

又吏部議覆都察院左都御史陳廷敬疏言督撫

保舉薦舉府州縣官須令第一條實填無加派火耗字樣第二條實填實心奉行

上諭十六條每月吉聚鄉村鄉約講解字樣餘條仍照舊例開具實蹟應如所請嗣後督撫保舉薦舉府州縣官員將此二條添註冊內如保舉不實別經發覺者照徇情薦舉卓異例督撫各降二級調用申詳之司道等官各降三級調用從之

二十七年湖廣道御史朱廷鉉條奏服滿候補人

員內有

特簡者有卓異者應不論班次即行錄用

上諭大學士等曰覽朱廷鉉所奏未必無故但治國家者以人才為要朕親簡之官如與一概丁憂者較年補授何時得錄用乎凡條奏合宜即為准行其間有私與否朕不問也下吏部議以單月補授卓異特用人員雙月附摺聲明酌用

二十八年奉

諭旨淮安揚州所屬被災地方甚為緊要府州縣員缺俱著奏聞選擇補授

又議准四省苗疆選員調補楚粵黔蜀四省中如黎平茶陵東川平越等界連苗地府州縣員缺令督撫於本省中揀選題補

定理藩院員外補用例吏部題理藩院郎中缺出例將叅領輕車都尉掣籤擬正陪具題今員外郎缺出亦應將步軍副尉騎都尉佐領侍衛等掣籤

擬正陪具題得

旨理藩院郎中員外等官缺出停其掣籤將八旗移送應補官員引見補授其應補郎中之人已補員外郎主事應補員外之人已補主事若遇伊等應補缺出仍令一併引見

又吏部議覆刑科給事中陳世安疏言吏部文選考功二司向有調取才能之例夫選司之陞選有俸冊可憑功司之處分有則例可考但得老成廉

靜之人查冊籍奉行足矣請嗣後兩司缺出止依
俸次陞補若老邁庸劣不時叅處應如所請從之
二十九年吏部以行取知縣事奏請奉

上諭行取知縣以科道用者甚多科道職任關係緊要著
九卿各以平昔所知學問優長品行可用者面同舉奏
尋戶部尚書王鵬舉清苑縣知縣卽嗣堯清廉慈
惠兵部尚書李天馥舉三河縣知縣彭鵬靈壽縣
知縣陸隴其居官有聲

上諭大學士等曰適九卿列薦有邵嗣堯陸隴其彭鵬三人其服官廉介朕所素知爾漢大學士亦有知者否梁清標奏曰三人允稱廉吏徐元文奏曰以臣所聞湖廣麻城縣知縣趙蒼壁牧民有聲聞武昌兵譟時所在州縣官俱棄城潛去惟趙蒼壁安撫百姓修城預備

上曰彭鵬邵嗣堯陸隴其趙蒼壁俱准行取
三十三年奉

諭旨國家以用人為要或有知其人可用而避嫌不舉者
或有明知其人不善而引為黨援者自今九卿當各將
所知居官賢能者敬慎公舉科道官職司耳目誠能於所
知賢者從公推薦不肖者立行叅劾則賢者勸而不肖
者懲治道豈不美乎

三十六年湖廣道御史朱廷鉉疏言卓異與行取
同膺異數嗣後應一例引

見從之

三十七年吏部議覆雲南巡撫石文晟疏言雲南省元江開化廣南廣西四府烟瘴地方請照粵西南寧等四府保題之例即於滇省郡縣中選擇廉能素著熟悉風土者調補或於滇省應陞官員內陞授并照福建臺灣例三年內稱職即行陞擢又鶴慶順寧永昌三府鄰近蒙番接連中甸外逼烏斯藏之地甚為緊要必得壯年勤敏郡守庶可捍禦統攝乞揀選賢員補授五年稱職亦即陞擢俱

應如所請嗣後元江四府屬知府以下知縣以上
准其保題調補教官雜職報部調補免其具題其
鶴慶等府知府缺出臣部照山陝二省奏補從之
又吏部議覆御史荆元寶疏言州縣官有牧民之
責為任甚重應如所請每月掣籤之後令其隨本
引

見可以居官者照常令其赴任有衰邁昏憤者以原品休
致二十以上輕浮冒昧者不分漢軍漢人分撥六

部各司辦事三年仍以原職補用得

旨依議同知通判亦著引見

又都察院左副都御史吳涵疏言編修檢討等員
陞轉壅滯請嗣後變通編修檢討照李濤汪楫之
例外補一二人少詹事侍讀學士侍講學士等官
照王士正徐潮顧藻王九齡等之例以京堂各衙
門調補一二人

上諭大學士等曰覽吳涵奏翰林官壅滯所奏極是翰林

官員係進士內選拔者教習三年又行考試擇其善者始留衙門不但伊等壅滯即滿洲漢軍翰林官應陞缺出俱與筆帖式較俸是以陞轉甚遲近見滿洲漢軍翰林所學皆好亦不減漢人此奏朕已知之不必令部議也

三十八年議准世職叅領以下補用武職例伯子男叅領俱以副將用伯子男叅領兼都督僉事銜輕車都尉火器營叅領俱以叅將用兼叅將銜佐

領騎都尉品級等官俱以遊擊用兼署叅將銜雲
騎尉品級等官俱以都司守備用兼都司僉書銜
護軍校驍騎校六品七品八品等官與候補筆帖
式執事人頭目俱以守備用

四十年奉

諭旨直省地方料理事務必須簡任賢能可移文總督郭
琇張鵬翮桑額華顯巡撫彭鵬李光地徐潮凡伊等所
屬道員以下知縣以上官員有實心惠愛民生居官清

廉者雖有呈誤降罰俱不必論各具摺開送內閣其別
省官員內有伊等所灼知者即越省亦着列名奏聞

四十一年

飭諭九卿薦舉毋得保舉同鄉及現任本省官員

四十三年停督撫保題行取知縣例四川巡撫能
泰疏言行取知縣請停督撫保題但將無錢糧盜
案者一槩行取引

見候用經吏部議駁

上諭大學士等曰覽能泰此奏保題行取知縣時不能無請託之弊且知縣錢糧盜案之有無皆注在部冊可查嗣後督撫保題之例著令停止即令該部於無錢糧盜案知縣內論俸每省行取三四員如此則可塞知縣奔競之路但伊等俱補用言官所係緊要俟行取到日再應詳察用之下九卿議覆尋議嗣後行取知縣不用保舉每省限定額數照部冊較俸行取從之

四十四年定各部郎中及編檢改補科道免其試

俸舊例監察御史內閣中書舍人試職一年方准
實授至是定卽中補授御史者停用試俸字翰林
官班在科道之上由編檢改補御史亦不用試俸
字

又吏部議知縣厯俸三年卽准考選科道似覺太
速嗣後應將行取知縣以各部主事挨班補用方
准考選至初任之中行評博亦俟伊等陞任後始
准考選科道從之尋又定行取知縣三年一次分

省定數直隸江南湖廣陝西各五員山東山西河南浙江江西廣東四川福建各三員廣西雲南貴州各一員行取到日與各項主事分數補授自是行取知縣無驟補臺中者

四十九年吏部奉

諭旨前以補授雲南貴州廣西四川四省官員不能如期到任懸缺甚多故豫發人員備用今觀此等官員但圖以邊俸速陞居官無一善者地方關係甚屬緊要嗣後

四省停其豫發仍照舊例歸於月選得缺人員嚴限速
催赴任其以前發往未經得缺人員俱著掣回各歸月
分補用

又奉

諭旨適引見行取知縣人材俱佳令其候補殊覺可惜著
留伊等於京食俸遇主事缺出以主事用遇要地知州
缺出以知州用

五十一年吏部議覆湖廣道御史徐樹庸疏言舊

例文武卓異及河工薦舉各員俱隨本引

見請嗣後直隸各省督撫如有特薦之員仍照例令其赴

部引

見庶督撫保題亦加詳慎又藩臬與督撫最為親近定例
大計不得薦舉卓異所以絕夤緣杜偏聽也嗣後
藩臬缺出督撫不許坐名題補聽部通行開列均
應如所請從之

五十二年福建巡撫覺羅滿保奏閩縣等十六州

縣員缺請於卓異人員揀選補授部議不准奉

特旨允之

又定在外論俸推陞之布政使按察使運使直隸
守道巡道員缺應通行開列恭候

欽點補授令其引

見其推陞道府以下知縣以上由吏部掣籤得缺者及督
撫題補並請留任之員俱令隨本引

見凡引

見過文職官員應照武職例三年內陞補者免其送部

又川陝總督鄂海疏言督撫提鎮揀選保送武弁
請以曾出兵効力者保送如無出兵効力之人應
論俸揀選保送以絕徇私之弊

上曰國家承平日久行間効力之人所餘無幾前此保舉
人員尚覺公平今漸滋流弊督撫提鎮等官皆各為其
子弟夤緣保送者多即部院大臣亦多為其子弟互相
援引此本著照鄂海所請行

又吏部議覆湖廣道御史徐樹庸疏言九卿保舉
陞用之員如有不肖者查原保舉官處分舊有定
例但年久法弛嗣後保舉人員倘貪婪事發將原
保舉之官從重議處又知府保陞道缺道員保陞
臬司缺其陞任之後尚未經到任者不准復行保
舉俱應如所請從之

五十三年奉

諭旨尚書趙申喬保舉張應詔陞補兩淮運使奏其為郎

中時能耐貧苦授知府不製衣服隨從數人為清官者
不係於貧富張伯行家道甚饒任所日用皆取諸其家
隨從四五十人今以為不清可乎為官之人一心為國
即為好官或操守雖清不能辦事無論諭旨批駁與部
駁之事積年累月槩不完結似此清官亦何裨於國事
五十五年

諭吏部行取直省知縣覃岱等四十二員授額外主事

又吏部題請引

見月官得

旨道員以下教官以上著滿洲侍郎一員帶領引見其中
有衰老不能來者即著革退

五十七年兵部題各衙門効力人員至推選時每
有弓馬生疎年力衰邁之人請於單月考驗弓馬
觀其年貌如有衰老病廢不堪者題明勒令休致
其有軍功帶傷之員雖年老仍行推用從之

五十九年限九卿詹事科道保舉人數並定保舉

人員陞授正印官之例九卿詹事科道每人一年之內保舉不得過十人凡准貢例監生員吏員出身等官必經該堂官及督撫保舉方陞京堂與正印官

六十一年奉

諭旨用人行政朝廷之大權也文官銓選掌之吏部武官選除掌之兵部近來督撫提鎮題補太多始不過州縣官千把總之類今則司道副叅亦皆題補矣值此用兵

之際姑且行之此習若久大有關係且保舉題補官員
內朕不知者甚多補用後遂皆稱為奉旨補授之員在
京大小職官皆朕所選用賢否易知若外省保題之官
非朕所素知豈能一一定其優劣下大學士九卿議尋
議河工官員關係緊要臺灣遠屬海疆而廣西之
南寧太平慶遠思恩四府雲南之元江開化廣西
廣南四府俱在邊遠此等地方官員仍照舊例令
該督撫保題調補其餘歷年督撫具題增添保題

之缺並條奏交與督撫保題之缺概行停止武職
副叅遊都守各官仍遵定例內應保題之缺揀選
銜缺相當者題補其餘亦概行停止以後不應題
補調補之文武官缺及有事故並越銜保題者將
該督撫提鎮并轉詳之官均照徇庇例降三級調
用從之

世宗憲皇帝登極

諭曰朕惟敷政之道用人為先闢門籲俊之典由來尚矣

然知人則哲自古為難朕在藩邸不與朝臣往來所以
內外大小官吏皆不能悉知今荷

皇考大行皇帝命繼承大統臨御之初簡用人材爾諸大
臣皆久蒙

皇考知遇任以股肱茲值

梓宮在上靈輿式憑爾等哀感交迫之時益當各盡忠藎
仰報高深內而大臣以及閒曹外而督撫以及州縣或
品行端方或操守清廉或才具敏練者爾等各據真知

灼見從公具摺密奏古人云內舉不避親外舉不避仇
爾等果矢公忠以人報國或素日同僚共事或同鄉同
年或門生親戚子弟俱准保奏勿避忌嫌疑勿徇私援
黨勿沽名市恩勿輕聽風聞勿言過其實有一於此則
上負

皇考任用之恩又負朕諮詢之意矣朕所需者人材但當
有舉無劾毋得修怨陷害爾等具摺或滿字或漢字各
須親寫不可假手子弟詞但達意不在文理字畫之工

拙其不能書寫者即行面奏又

命王以下閒散宗室以上於屬下人員內各保舉一二人

又奉

諭旨內廷各執事人員俱係隨侍

皇考之人其中亦有大臣官員子弟著各該處總管揀選
保奏引見朕酌量錄用有通曉滿漢文者著聲明

定補用筆帖式考試之例各部院補放滿洲蒙古
漢軍筆帖式至繙譯筆帖式班次吏部試以繙譯

補用至滿字筆帖式班次試以繕寫滿字補用如不能繕譯繕寫者俱各駁回將其次之人考取補用此駁回之人給假一年學習好時具呈入伊原班註冊如遇缺出仍行考取補用

臣等謹按各部院衙門筆帖式舊例由官學生庫使領催補授順治九年題准舉人生員亦得補授康熙元年以廕監生補授四十五年奏准現行補授各部院滿字漢字筆帖式分為二十一班凡補

用之人俱照各班日期先後挨次輪補又有將軍督撫衙門省城邊塞等處筆帖式即入于二十一班內照咨送日期挨次補用蓋筆帖式為八旗出身之路凡識滿漢字者由繙譯考試止識滿字者由繕寫考試當考試時

上命王大臣或大學士等閱卷品定甲乙進

呈優者分別品級錄用附錄於是以誌選用之大概焉

皇朝文獻通考卷五十五